

AUMENTO DI ORO A AUMENTA Y DOLLAR A BAHÁ

AMSTERDAM—E taza di cambio di Dollar Americano a bolbe baha ayera ariba e mercadonan di cambio na Europa.

E problemanan na banconan di ahoro na Estados Unidos ta sigui influencia e Dollar, mientras di otro banda prijs di oro a aumenta drasticamente.

Ariba e mercado di cambio na Amsterdam, e taza medio cu a keda fija pa Dollar tabata 3.7180 cu ta diez cent mas abao cu Dialuna. Na ciere, e Dollar a sigui baha te alrededor di 3.70 florin. Banconan na Hulanda ta pidi awe 3.77 florin pa un Dollar, y ta paga 3.66 florin. Esaki ta diez cent mas abao cu Diamars.

E Dollar Americano a baha tambe na otro ciudadnan Europeo. Na Frankfort un taza oficial pa cambio a keda estableci na 3.2910 Mark, cu ta 8.5 Pfennig menos cu Dialuna. Na ciere a mantene 3.2745 Mark cu tabata dos cent ainda mas abao.

Pond Sterling tambe a registra un ganashi di taza enfrente Dollar. Esaki tambe pa motibo ci e expectativa general di e Ministro Britanico pa Asuntonan di Finanzas, Nigel Lawson, na presentacion di e presupuesto. Un manejo mas severo ariba tereno monetario a keda anuncia pa asina tene e inflación abao y sostiene e Pond Sterling.

E taza di cambio di Pond Sterling a suci te 1.1445 Dollar, cu ta e nivel mas alto alcanza for di inicio di e aña aki y casi tres cent di dollar mas cu e taza di cambio di Dialuna.

E caída di Dollar manera ta costumbre a ser acompaña pa aumento di prijs di oro, cu a aumenta cu alrededor di 20 dollar pa ounce, esta 31.1 gram.

TEMBLOR A KEDA REGISTRA NA ST. MAARTEN

ORANJESTAD(AAN)—Un temblor leve a keda registra durante fin di siman na Sint Maarten, caminda basta panico tabata consecuencia di e movicion di suelo, cu a keda determina na 6.6 ariba e escala di Richter.

Segun informenan, e centro di e temblor tabata pa Zuiddoost di Puerto Rico, mientras tambe otro islanan den e vecindario a sinti e efecto di e temblor cu a tuma lugar Diasabra.

Dialuna otro temblor a keda registra den e region, y tabata e bihaa aki na St. Croix caminda e efecto a ser sinti.


Informenan ta indica cu e islanan ta keda den e region caminda por registra temblor, cu a causa basta panico Diasabramainta na Sint Maarten.

PARLAMENTO DI ARUBA TA REUNI

ORANJESTAD(AAN)—Diamars dia 26 di Maart Parlamento di Aruba lo reuni pa trata un punto di agenda.

Ta trata di e desaroyonan di terminacion di operacion di Lago y su consecuencianan ariba entre otro tereno economico, financiero, social y ambiental pa Teritorio Insular di Aruba.

E reunion a ser pidi pa e fraccion di PPA y lo inicia pa 8 or di mainta.



DIARIO

DI ARUBA

Bo Matutino
Netamente Arubiano

DIARANZON 20 DI MAART 1985

AÑA 4, No. 1276

ACUERDO LOGRA NA CURACAO POR TIN RESULTADO PA ARUBA

ORANJESTAD(AAN)—Ayeramadrua, politiconan, sindicatonan y comercio di Curacao a yega na un acuerdo pa atende e situacion social economico na Curacao. Informantenan a revela na DIARIO cu e acuerdo logra na Curacao por tin consecuencia pa Aruba tambe, comoquiera cu e isla ta forma parti di Antillas ainda y comoquiera cu e acuerdo ta papia di un sincronizacion di manejo insular di Curacao na esun di Gobierno Central.

E acuerdo ta contene cierto puntunan cu ta netamente di Curacao, pero di otro banda tambe ta contene puntunan cu ta di gran importancia pa Aruba, cu ta ser menciona de facto den e acuerdo, caminda ta ser papia di e hecho cu e cooperacion cu Aruba despues di Status Aparte, no por causa inestabilidad estatal o politico na Curacao.

Ademas e acuerdo ta papia di un manejo encunto asuntonan cu ta ser regla na un forma central, esta pa medio di Gobierno Central, y cualquier paso di e Gobierno di Antillas den e caso aki, por tin influencia y hasta resultado pa Aruba. Asina a ser papia di reduccion di prijs di alimento y di medicamento y tambe di material pa construccion. Tambe lo mester baha e tarifican di profesionnan libre, mientras cu segun e acuerdo di 15 pagina mester yega na medida nan general ariba sueldo y aumento di belasting ariba sueldo.

Aparentemente e acuerdo ta na favor pa duna Gobierno durante un aña di tempo cierto poder pa actua den casonan especifico y aunke no a ser papia di e Machtigingswet, e medida aki por ta mustra den tal direccion.

Manera a ser bisa cierto asuntonan lo mester ser atendi pa Gobierno Central cu no por aplica un regla ainda solamente pa Curacao, especialmente ariba cierto terenonan.

Mientrastanto informantenan a bisa DIARIO cu e asunto no a ser atendi ainda den seno di Gobierno Central, comoquiera cu e Ministro di Finanzas, Gilbert de Paula, no a presenta ayera na su oficina, despues cu el a keda participa te den horanan di madrua na e reunion en cuestion.



Diavierna ultimo Diputado di Cultura, Grace Bareño a inaugura e exposicion di pintura di e pintor Arubano, Johannes Donati. E exposicion por ser presencia durante horanan di trabao den e sala di exposicion di Biblioteca Publico te cu Diavierna awor. Un total di 32 obra ta forma parti di e exposicion aki cu ta un muestra di e talento di uno di nos Arubianonan. Un y tur ta keda invita cordialmente pa bishita e exposicion di e pintor Donati na Biblioteca Publico di Aruba.